

摘藻堂四庫全書薈要

集部

欽定四庫全書薈要卷一萬八千五百九十一集部

御選明詩卷九十一

七言律詩二十四

沈瓊蓮

寄兄

疎明星斗夜闌珊玉貌花容列女官
風度鳳凰天樂近雪晴鳩鵲曉樓寒
昭儀引駕臨丹宸尚寢熏爐熱紫檀
肅肅六官懸象魏春風前殿想鳴鸞

送弟溥試春官

少小離家侍禁闈，人間天上兩依稀。
朝迎鳳輦趨青瑣，夕捧鸞書入紫微。
銀燭燒殘空有夢，玉釵敲斷未成歸。
年年望汝登金籍，同補山龍上衮衣。

孟淑卿

香奩冬詞

默坐深閨思有餘，霜威漸覺襲衣裾。
青綾被冷無鴛夢，紫塞天寒斷雁書。
竹葉舞風侵戶響，梅花和月上窗虛。

雙蛾爭似庭前柳
臘盡春來忽又舒

陳懿德

閩山道中

行盡山蹊路渺茫
幾家茅屋對斜陽
引泉竹溜穿廚入
墮粉松花繞舍香
樵徑無人閒卧犢
石田初雨漸分秧
平生頗有山林癖
欲向溪邊結草堂

朱妙端

春雨

濕雲漠漠雨如絲花滿西園蝶未知金屋曉寒鶯語澀
畫樓春晚燕歸遲宮桃有恨啼紅淚煙柳多情斂翠眉
檀板金尊久寥落孤城愁聽角聲悲

湖曲

湖光山色映柴扉茅屋疎籬客到稀閒摘松花釀春酒
旋裁荷葉製秋衣紅分野火明書屋綠漲平波沒釣磯
惟有溪頭雙白鳥朝朝相對亦忘機

夜坐

吳蠶初出悄無眠數盡更籌覺暮寒柳色弄陰春已暝
角聲吹月夜將闌金爐火冷沉煙細羅幌風生蠟炬殘
夜坐空庭望銀漢碧天如水露漙漙

金文貞

春日旅館偶成

陌上原頭楊柳纖東風消息在江南故園門徑曾栽五
明日時光更起三春盛杜鵑空自怨枝深鸚鵡許誰談
晝長公館清如水坐聽鳴琴久欲酣

夏日送大卿君赴任武岡

麥秋春去客程初遠逐湖南萬里餘人靜夜鵲啼有韻
道偏秋雁淚無書簷蛛網盡絲難就梅豆丸成苦未除
伯樂自來何處覓錯將良驥駕鹽車

楊安人黃氏

寄夫

雁飛曾不到衡陽錦字何由寄永昌三春花柳妾薄命
六詔風煙君斷腸曰歸曰歸愁歲暮其雨其雨怨朝陽

相聞空有刀環約何日金雞下夜郎

朱桂英

題虎丘壁

梵閣頻臨入紫霞憑闌極目渺無涯
天連淮海三千里煙鎖吳城十萬家
南北舟航搖落日高低丘隴接平沙
老僧不管興亡事安坐蒲團課法華

端淑卿

春

院外鶯啼二月中
粧臺日影映簾櫳
潤回野草茸茸綠
暖入瓊枝簇簇紅
乍試輕羅沾社雨
偶嘗新釀醉東風
閒來檢點芳時事
花底青絲墜小蟲

寄外

鎮日多愁屢廢餐
閉門獨坐遣應難
庭前別我言猶在
月下懷君春又殘
萬點落花誰著眼
一聲飛雁獨凭闌
夢回湘簟無消息
更啟前書仔細看

屠瑤瑟

燭影

畫梁疎影按紅牙
光入花叢比桂華
時伴瓊筵翻廣樂
乍浮紈扇隔輕紗
溶溶春夜疑宵永
閃閃秋閨共月斜
散盡纏頭天欲曙
清光猶照五侯家

沈天孫

睡蝶

一夜和風遍海棠
園蝴蝶拂柔桑
飛隨芳樹霞衣好
倦宿琪花粉夢香
似與名蕤分豔色
不堪清露濕衣裳

因風又度雕闌去却伴遊絲過石梁

初夏走筆和湘靈

旖旎春風柳乍醒榴花刺眼媚遙汀
傍人桐樹枝枝綠出水荷錢葉葉青
隴外喬桑飛雉堞前茂草隱新螢
春從杜宇聲中去空翠濃陰又滿庭

頽桐

朱萼疑看九月楓繁枝又借嶧陽桐
丹鬚吐舌迎風豔絳蠟籠紗照月空
西域應分安石紫寢宮可作麥英紅

綠珠宴罷歸金谷七尺珊瑚映水中

送西昇秋試時七夕前二日

一詠河梁黯自驚
蘭舟疊鼓送君行
朱絃暗度銷魂曲
銀管吹殘唱別聲
露下西泠秋影白
煙深靈鷲月華清
翻憐後夜雙星渡
何事人間唱渭城

朱德璉

寄弟君典

搔首飛蓬四載餘
爾音金玉幾回虛
天邊雁陣都成字

壁上蝸涎宛作書露草侵堦蒼蘚滑煙蘿遶徑綠筠疎
何堪骨肉同寥落南北無由慰索居

鄧氏

東園踏青

芍藥叢邊露氣沉步隨芳草共幽尋桃花薰日紅濃淡
柳葉迷煙翠淺深何處香泥忙社燕誰家晴檻噪時禽
峭寒羅襪渾無力斜倚東風碧樹陰

王鳳嫺

館娃宮次韻命二女同作

香徑有基惟鳥跡，
廡廊無主剩苔花。
錢旋舞，留金鑿
蝸字縱橫見玉釵。
頽榭草深歸燕繞，
故宮月冷野狐埋。
西風禾黍斜陽道，
過此行人合愴懷。

張引元

寄妹

金風初度井梧枝，
正是懷人病起遲。
兩地離愁懸一鏡，
九秋新恨上雙眉。
久虛詠雪聯芳句，
每憶挑燈共課時。

塞雁已歸書未達
江城寒月照相思

館娃宮次韻

繁華事散惟荒土
麋鹿踪消只蘚厓
皓月尚疑懸玉鏡
霞桃猶似妒金釵
蛾眉一瞬歌塵散
魚腹千年俠骨埋
今日姑蘇回首嶺
雲江水不勝懷

張引慶

館娃宮次韻

禾黍已蒙香徑土
蘇臺還恨鎖蒼厓
雲歸疊疊堆鴉鬢

花落紛紛擲燕釵
此日錦笙惟鳥弄
當年雄劍自塵埋
荒原古柏西風裏
漫對吳山獨愴懷

范壺貞

煙雨樓圖

煙嵐無限雨中情
遠近樓臺一望平
吳苑草荒麋鹿走
越江春盡鷓鴣鳴
長堤柳樹迷春渚
白水菰莢繞郡城
最是晚來新月下
萬家燈火隔湖明

馬氏

秋閨夢成時

屈盡纖纖鎖盡眉
廣寧消息竟遲遲
十年笑語燈前事
千里關山枕上期
萱草旣零堂北雨
梅花將發嶺南枝
青春儘伴寒更老
再莫相逢日落時

方孟式

清潭

清晝連牀笑語新
徘徊佳節眷芳春
一聲鶯囀桃花岸
半幅裙拖洛水濱
銀燭小窗忘夜雨
玉堦叢錦惜朝茵

歡娛不覺霞流綺
暗裏韶光又一旬

春日隨任建寧過東林寺

草堂今又暫停車
彷彿當年醉月華
絕壁青山星斗落
環溪雪竇水雲賒
荒村沽酒和松葉
茅舍疎籬繞菜花
三十六峯連翠黛
門前五柳是誰家

山路雜興

劃然鸞鶴奏清茄
篠簜穿林日欲斜
春去柴門餘綠柳
香來籬箔入黃花
珠簾噴雪垂千尺
茅屋封雲隱數家

煙景參差迷客思殘碑古道帶流霞

寄盛夫人

繁霜百歲冷春幃常共寒燈泣落暉紅淚已辭機上錦
白頭尚著嫁時衣煙籠竹葉涼生案雨濕梨花靜掩扉
盃酒樓頭明月夜迢迢夢遶楚天微

方維儀

暮春得張夫人書

長干塵起更愁予避亂荒居數載餘鄉夢正勞新戰地

春風吹到故人書
庭梧寂寞清琴冷
江柳迢遙白髮疎
惟冀鳳簫來白下
舊家同里候檀車

寄山東何大方伯夫人之廣西

機絲吳縞隔江東
百粵雲峯天漢中
水到湘灘思已別
文留鉛鋌夢還通
鳳巢鑿玉眞雙美
龍洞成霖滿大空
迢遞五千家莫問
音書何處托離鴻

沈宜修

秋思

鵲鏡容消只自知
碧雲黃葉動離思
閑愁紫袖衫前色
舊恨青春樹上絲
子夜有情新樂府
傷秋多病送歸辭
江頭八月西風起
寥廓天高鳥度遲

立秋夜感懷

涼夜悠悠露氣清
暗蟲淒切草間鳴
高林一葉人初去
短夢三更感乍生
自恨迴波千曲遠
空餘殘月半窗明
文園多病愁秋客
搖落西風萬古情

葉小鸞

早春紅于折梅花至偶成

紅于侍兒名

遲遲簾影映清宵日照池塘凍欲消
公主梅花先傳額美人楊柳未垂腰
紗窗繡冷留餘線綺閣香濃繞畫綃
試問侍兒芳草色堦前曾長翠雲條

昭齊姊約歸阻風不至

寒爐撥盡燼微紅漠漠紅雲暗碧空
離別遂如千里月歸期偏悵一帆風
愁邊花發三春日夢裏年驚兩鬢中
雨雪滿窗消未得定應握手幾時同

祁德淵

送黃皆令

西風江上雁初鳴
木落寒塘一櫂輕
遶徑黃花歸故里
滿堤紅葉送秋聲
片帆南浦離愁結
古道河梁別思生
此去長塗霜露肅
何時雙鯉報柴荆

朱德蓉

上巳

桃花新水浣春衣
舊日蘭亭到亦稀
斷岸羽觴晴日暖

遠山橫笛暮雲飛沙棠舟近江鷗起玳瑁梁空海燕歸
尚有采蘋思未定不堪月色上羅幃

鄧氏

七夕

誰遣鵲梁貫絳河靈妃應是早停梭雲鬟待駕輕飛輦
月鏡催粧淺步羅綳氏鳳聲方未已漢庭鸞使更相過
佳期只恐箕星妬風雨休教浪作波

是夜陰

姚嬀俞

冬日

坐擁烏皮倚隱囊，且翻梵夾靜焚香。
淒淒庭院悲風急，漠漠江天朔雁翔。
一段旅懷還磊落，百年心事付蒼茫。
登樓望遠迷鄉樹，又見寒鴉送夕陽。

章有渭

舟行即事

曉霧迷離彩鷁輕，櫂歌徐動見新晴。
臨湍鷺子亭亭立，夾岸蒲花漫漫生。
遙指小山遮塔影，忽經深樹出鐘聲。

晚涼不覺羅衣薄自愛澄湖片月明

陸氏

追憶

錦瑟蒼涼憶舊踪芳年行樂太匆匆濃香簾幕圖書靜
明月樓臺笑語通人竝玉壺丘壑裏才分采筆黛螺中
祇餘華表魂歸去夜夜星辰夜夜風

趙燕如

金白嶼王仲房沈嘉則九日醵金會飲賦詩見

贈卽席和荅

少小秦樓學燕飛
楚雲湘水見應稀
忻逢此日重陽酒
還整當年舊舞衣
結客自憐非趙俠
覲粧無復是南威
勸君未醉休辭醉
細插黃花且莫歸

馬守貞

延秀閣和顧太湖韻

飛閣凌雲向水開
好風明月自將來
千江練色明書幌
萬疊嵐光拂酒杯
何處笛聲梅正落
誰家尺素雁初迴

芳尊竟日群公坐得侍登高作賦才

孫瑤華

次韻汪仲嘉戲代蘓姬寄吳郎之作

由來嬌愛競新知空結同心不忍持
山上蘼蕪寧再遇陵西松柏詎相期
羅襦明月君休繫紈扇秋風妾不辭
極目自憐春欲盡流鶯飛處草離離

景翩翩

七夕

樓前蕭史憶吹簫雁足西風倍寂寥望斷支機應化石
愁填烏鵲未成橋素毫月冷吟梧葉紈扇秋回識柳條
姊妹東隣如乞巧莫教瓜果浪相招

馬珪

春日汎湖憶舊

一隻蘭舟幾日湖同心暗結事難圖比來西子應無主
何處羅敷自有夫沙暖燕歸春閣早醉餘人別暮橋孤
年年只解看花到草色今朝獨弔蘇

若箇釵行憶昔招曲池
阡木漸蕭蕭浪翻金錦
猶餘麗花落胭脂尚帶
嬌綺席已更蓮葉舸綵
繩又挂綠楊橋相逢此
後忻非晚盪漿從君不
記朝

薛素素

春日過茅山

參差臺殿閼靈蹤
句曲茅君次第逢
洞口鶴窺曾過客
日中人上最高峯
華陽澗水桃千樹
舊館壇碑闕幾重
遙望金沙何處是
浮圖千尺罩烏龍

郭鸞鸞

寄簡平子

一去音容便杳然尺書遠不到吳天夢中小院遠依舊
鏡裏崔徽不似前護病多忘睂月淡懶粧一任鬢雲偏
愁來盡日無消處手擘生香續篆煙

羽孺

落花

一自相從十八姨春山游遍故枝移撲簾時助嬌娥繡

點硯常窺騷客詩國色尚存衣帶引清香不改月明知
蝶來北苑蜂南去誰向樓頭話別離

昨日層岡今曲堤乍看誰信舊成蹊儘教拂掠隨鴉陣
怪道顛狂伴燕泥蔡琰忽驚歸異域西施空自憶耶溪
人間離合渾無定免去烏來到處迷

纔向詩人又酒人半留窗屋半鋪茵自來姣好根荄薄
却為輕狂轉盼頻任是穠華迎淑景也應飄泊到殘春
青陽若得常如舊子建何須賦洛神

周文

中春道中送別

酒香衣袂許追隨何事東風送客悲
溪路飛花偏細細
津亭垂柳故絲絲
征帆人與行雲遠
失侶心隨落日遲
滿目流光君自惜
莫教春色共差池

秋日過吳門感舊

香殘帶緩不勝愁
又見蕭條一片秋
身到故鄉翻是客
心惟明月許同舟
數聲新雁凌江下
幾點寒鴉逐水流

遮莫平生多少恨閒吟欹枕更悠悠

丘謙之

文如留館中賦別

回思往事怨蹉跎復有新愁奈若何清夢不緣神女苦
小詞難得雪兒歌隔窗雨逐流蘇墮落葉飛隨翠簾多
若問此時留別意雙星七夕在銀河

王微

舟次江許

一葉浮空無盡頭寒雲風切水西流蒹葭月裏村村杵
蟋蟀霜中處處秋客思夜通千里夢鐘聲不散五更愁
孤踪何地堪相托漠漠荒煙一釣舟

新秋逢人初度感懷諸女伴

憶昔年年秋未分曉粧一院氤氲氲階前暗印朱絲履
窗裏同縫白練裙子夜歌成猶待月六時參罷悟行雲
即今拾翠溪邊望涼露如珠逗水紋

湖上次韻荅黃孟晚夫人

去住湖山別有緣
門前紅葉滿來船
劉綱夫婦霞為骨
謝蘊家庭雪作篇
翠袖風前誰薄醉
黃楊樹底與參禪
回思飄緲伊人跡
只隔鴛鴦南浦煙

冬夜渡江

楚雲天際似相邀
旅思無端鬪沈寥
篙影沒寒燈寂寂
樹聲留葉岸蕭蕭
波從去雁分斜月
人共棲烏匝半宵
一片離心煙共水
江南江北自歸潮

楊宛

夢還仙都幽踪宛若閒房寂然獨貯玉硯有識
舊名云云可憶

怨夢因無好夢成昨宵忽得快平生數間矮屋浮雲外
幾曲澄溪待月明驚見道書新著蠹憐餘半硯舊題名
文心一縷三生業只恨清愁攪墨兵

秋日書梵經藏佛腹

碧瓦雲楸映半塘靜從秋色到修篁聊存心力於經卷
不負閒身住草堂微雨暗飄毫素潤輕風徐動墨池香

書成却恨無人識故向真空密處藏

張璧娘

寄林子真秀才

黃消鵝子翠消鴉簾拂層冰帳九華裙縷褪來腰束素
釧金鬆盡臂纏紗牀前弱態眠新柳枕上迴鬟壓落花
不信登牆人似玉斷腸空盼宋東家

王秋英

冬日寄韓生於玉融

朔風振撼似瀟湘滿樹歸鴉噪夕陽不見王孫停駟馬
惟聞牧豎喚牛羊荒山野水悲長夜懶病疎容怯凍霜
漠漠陰雲愁黯黯幾時相對一鑪香

歸楚留別雲夢

兩年歡會夢魂中聚散人間似轉蓬歲月無情催去燕
關河有信寄來鴻劒沉延浦光終合瑟鼓湘靈調自工
他日扁舟尋舊約夕陽疎影楚雲東

玉華山樵

棧道早行效白香山體

連雲石磴曉蒼蒼
天險分明百二強
萬里西南通鳥道
雙旌上下轉羊腸
一溝流水一溝竹
幾樹垂楊幾樹桑
登覽不知行役倦
半生詩債却猶償

和韻荅玉山李誠中

窮途往往白頭新
誰謂綈袍念故人
此日不須辭舊雨
空山聊自度殘春
艱難作客仍多病
生死無家任此身
二十年來相憶處
幾回月夕與風晨

野亭父老

送春

怨風怨雨總皆非
風雨不來春亦歸
蜀魄啼殘花影瘦
吳蠶吃盡柘陰稀
枝頭軟綠梅初熟
口角黃乾燕學飛
我亦懷歸歸未得
擔頭猶挂舊蓑衣

萊山樵者

濬縣眺望

河流遠徙大伾存
極目中原野色昏
禾黍油油迷故國

羝羊逐逐過前村
黃花冷笑三秋客
紅葉初飛十畝園
賴有淹留同調在
芒芒禹跡試重論

雲谷樵夫

書大道寺壁

西華雲臺去路長
投閒翻為看山忙
十年有夢尋中嶽
四月披雲過太行
清世誰能便吏隱
幽棲吾獨愛僧房
昨來不寐焚香坐
讀盡楞嚴夜未央

無名氏

祈澤寺詩

研池滿座落花香墨透纖毫染漢章靜卧衲衣雪似水
高懸紙帳月如霜杯浮野渡魚龍遠錫振空山虎豹藏
幸對爐烟坐終日煮茶清話得徜徉

西湖八景詩

錄二首

冷泉猿嘯

冷泉亭下北山陲曾見雌雄共引兒慣聽山僧朝說法
能隨木客夜吟詩松坡日暖人遊後蕙帳風寒鶴怨時

惆悵遺音無處覓竹鷄啼老野棠枝

浙江秋濤

怒挾西風勢未休滔滔何處覓安流青山隔岸分吳越
白浪排空混斗牛鐵箭有靈來昨日素車遺恨已千秋
晚來試倚樟亭立楓葉蘆花滿眼愁

還家詩

春色闌珊四月天數聲啼鳥落花前荷知有熱先擎蓋
柳為無寒漸脫綿處處勸耕梅子雨家家繅繭竹籬煙

憑誰寄語仙源客
洞口雲封信不傳

書玉田行館

老去年華暗自驚
殊方節序倍關情
蕭條旅館孤燈宿
迢遞歸塗白髮生
海甸星河分歲色
山樓鼓角動春聲
柳盤柏徑誰相識
悵望鄉原北斗橫

題金陵沙士清樂清軒

竹裏行廚竹外門
宛然風景似山村
石闌柳暗藏新雨
詩壁苔荒沒舊痕
林下鳥鳴花自落
溪頭鹿過水偏渾

晚來半掩東軒卧一枕梨雲鎖夢魂

朝鮮國臣鄭夢周

望景樓

百尺樓高石徑橫秋光一望不勝情青山隱約扶餘國
黃葉紛紜百濟城九月西風寒客袂百年俠骨誤書生
天涯日沒浮雲合回首依依望玉京

權近

題鶴鳴樓

鶴鳴樓上久徘徊
環珮珊珊緩步來
已喜清歌和寶瑟
況看纖手奉金杯
南臨帝甸山河壯
北對天門日月開
得被內臣宣聖澤
六街三日醉扶回

金九容

江水

江水東流不復回
雲帆萬里向西開
菰蒲兩岸微風起
楊柳長堤細雨來
驚夢遠迷箕子國
旅愁獨上楚王臺
行行見說巫山近
一聽猿聲轉覺哀

朴原亨

度大同江次韻

遠傳丹詔促行裝暫駐星槎淚水陽江浦雪消春意動
郵亭日暖客懷長一杯且可酬佳節萬里無勞憶故鄉
野闊天低山似畫不禁詩思入蒼茫

權擘

楊花渡次陳給事韻

山亭置酒近江湄興至頻傾白玉卮萬里歸來多客恨

卷九十一
一時登眺得神怡高標已覺冰霜操新調還聞白雪詞
北去他年如記憶也應飛夢到遐陲

李荇

答鹿峰給事

歸袂匆匆不可攀銷魂祇是黯然間鹿峰正在千林外
鳳節全無半日閒今日預將詩作別他宵何忍月同還
此生難復陪清賞悵望雲霄玉筍班

蘇世讓

荅鹿峰給事

珍重龍門豈易攀，屢承清誨笑談間。
極知後會終無地，其奈前程苦未閒。
佳境總為忙裏過，好詩空貯橐中還。
明朝悵望雲山遠，杳杳仙踪隔鷺班。

良策道中次韻

輕雲釀雨欲淒迷，長路愁衝滑滑泥。
奔霧逐風歸遠岫，亂流驚野過前溪。
潮從小浦平時上，燕掠春蕪盡處低。
高卷湘簾望山氣，夕陽猶在短峯西。

金安老

漢江陪宴次韻

人間不信有丹丘
漢水仙舟即十洲
夕日蘸波紅漾漾
江煙連樹翠浮浮
晴川有句還題壁
長笛何人更倚樓
天上明朝遙悵望
遐陬能復記茲游

尹仁鏡

登漢江樓次韻

郭外澄江江上臺
登臨頓覺隔氛埃
遙山雲歛雨初霽

極浦波平潮又來
明月似迎星使出
輕帆須趁晚風開
佳辰佳境兼佳客
乘興休停到手杯

金麟孫

次韻別吳副使

臨分盡醉側烏紗
長路高低日易斜
好雨多情知滑道
輕風惜別解飛花
留春縱欲兼留客
戀闕其如又戀家
一去茫茫遼薊遠
銀河何處問仙查

許洽

漢江陪宴次韻

綠水靈源自五臺新添好雨絕塵埃長洲芳草移船近
遠渚輕鷗避櫂來景物盡供今日興襟懷須向此中開
猥參勝引非吾分擬向巖前倒酒杯

國有酒巖酒
流出其下

金謹思

別吳副使次韻

方空歲歲感輕紗半榻香煙一穗斜萬里往來蝴蝶夢
三春開落杜鵑花吹殘遠笛誰懷土過盡良辰不在家

日暮關山雲樹隔天津何處泊靈查

尹殷輔

游漢江次韻

江上天然百尺臺澄波無綠鏡無埃茫茫極浦南北
渺渺長空鳥去來汀草有情吟外碧岸花隨意望中開
叨陪高會誠逾分乘勝還須倒百杯

申光漢

次華使張承憲公游漢江韻

天上河源落五臺樓前澄影隔塵埃楊花春盡帆歸遠
楮島煙消雁影來物色不隨遊子去芳樽今為使君開
三韓勝地皆方丈更借仙風傾一杯

癸巳三日寄茅洞瑞山

去年三月初三日燕已歸巢花已開人事天時多異態
別情春思重相催前村後谷應無恙舊約同游底不來
茅洞風流還可記善山雖去瑞山回

三三九九年年會舊約猶存事獨非芳草踏青今日是

清罇浮白故人違，風前燕語聞初嫩。
雨後花枝看亦稀，茅洞丈人多不俗。
可能無意典春衣。

林百齡

游漢江次韻

王室千年作翰藩，欣聞使節頌聲喧。
登樓未倦陪歡賞，汎水還容接笑言。
舉網漁人貪似獺，操舟穉子捷於猿。
夷猶領得滄州趣，還向春風望故園。

李潤慶

漢江次韻

漢江形勝表東藩使節登臨鼓吹喧對景每憑詩遣興
通情猶借譯傳言忘機自幸參沙鳥隨世何殊束檻猿
回首風光堪遠矚雨催新綠遍郊園

徐敬德

靈通寺次題壁韻

松溪一路入青林林下禪居晝亦陰觸石泉流三面轉
倚天山色萬重深清歡直欲朝連夜勝引應難後繼今

數局枯碁談笑裏不知雲日已西沈

辛應時

送歐大行還朝

鴨綠江頭送櫂聲東風吹淚若為情人間離別傷今日
天上音容隔此生衡浦雁迴驚遠夢洞庭春盡渺歸程
遙知萬里相思處南斗橫斜片月明

朴淳

太平樓次歐公韻

來游萬里魂應斷獨倚青冥思更賒天闊楚鄉飛客夢
路窮蓬海駐仙查山連睥睨雲長暝春半池塘草欲花
簾外夕陽看漸沒消愁惟有醉流霞

李珣

辱編修黃公示沿塗之作賦呈

丁年行役記吾曾遼薊修塗客念憑歷歷道邊孤店月
依依天上早朝燈身回蝸殼何由轉班入蛾眉不再能
玉署新詩分物色瑤臺指點一層層

送黃公還朝

長川冰雪覆寒沙
此日愁聞入塞笳
兩地雲泥分席上
一江南北即天涯
徒勞永夜游仙夢
漸遠明河貫月查
珍重詩篇兼贈處
媿將燕石報瓊華

金贍

送別正使黃公還朝

月落關城鼓角鳴
星軺夙駕向神京
長江自昔分南北
兩地從今隔死生
接塞凍雲迷別路
亂山晴雪照行旌

那堪獨夜龍灣館愁對寒燈夢不成

高敬命

別正使黃公

好音無路託西歸心逐仙查自奮飛
鴨水寒波添別淚鵲岑晴雪點征衣
謾將便面藏懷袖何計承顏御勒鞿
匏繫海濱身已老百年形影欲誰依

柳根

萬歷丙午五月送朱蘭嶼太史還朝

玉節東來鳳詔頒暮春江上乍承顏高懷獨出形骸外
雅賞長存水石間目斷未堪魂夢遠形留只得髣髴班
相思別後如明月萬里清光不可攀

許筠

吳子魚莊歸興次韻

松關竹徑帶晴煙家住溟州第二天繞屋溪聲來更遠
捲簾山色自堪憐家人宿火炊籬菜坐客清談汲茗泉
偏縛塵纓為傲吏幾時鄉思賦歸田

筠家江陵江陵古
溟州也在五臺山

下三韓有十二洞天此為第二洞天

金銊

寄友

楊花落盡草淒淒
楚客傷離思轉悽
佳節一年寒食過
亂山千疊子規啼
虞翻去國身全老
王粲登樓賦幾題
相約天涯回白首
昭陽江上夕陽低

申欽

寄友

廣陵三月已飛花
漢水孤帆落日斜
新結茅茨分洞府
欲隨麋鹿作生涯
平波細雨催耕犢
曲水游魚上釣叉
舉世盡從忙裏過
似君行樂獨堪誇

李承召

詠燕

畫閣深深簾額低
雙飛雙語復雙棲
綠楊門巷春風晚
青草池塘細雨迷
趁蝶有時穿竹塢
壘巢終日啄芹泥
託身得所誰相侮
養子年年羽翼齊

李子敏

賀聖節詩

九達初日五雲覃虎拜彤庭百辟參黼黻星辰璇極北
梯航玉帛越裳南河清適際千年一萬壽齊呼萬歲三
遐壤小臣陪舞獸內尊偏倚主恩酣

梁亨遇

游龍山呈吳子魚先生

桃花開後杏花稀客子來時燕子飛山郭數村芳草合

野籬三面亂峯圍
風塵岐路何年盡
破帽長裾此計非
遙憶故鄉歸不得
白鷗春水掩柴扉

宏演

游紫清宮

洪厓先生舊所隱
階下碧桃花飄零
夜光出井流瓊液
露浥松根生茯苓
天女或攜綠玉杖
仙人自讀黃庭經
隣寺歸來不五里
回頭望斷煙冥冥

許景樊

次伯兄筇高原望高臺韻

層臺一柱壓嵯峨西北浮雲接塞多
鐵峽霸圖龍已去穆陵秋色雁初過
山迴大陸吞三郡水割平原納九河
萬里登臨日將暮醉憑青嶂獨悲歌

次仲兄筇高原望高臺韻

崔巍雲棧接青霄峰勢侵天作漢標
山脈北臨三水絕地形西壓兩河遙
煙塵暮捲孤城出首宿秋深萬馬驕
東望塞垣鼙鼓急幾時重起霍嫖姚

孫谷集詩

曉行板橋村

水關西路聽雞鳴，嶺月初沈曉霧平。
人響閒聞茅店語，馬蹄連上板橋聲。
悠悠漸喜鄉山近，瑣瑣偏知旅態生。
更下長坡說徒侶，天明須趁及先行。

寄問許典翰

甲山西北接陰山，鳥道懸雲不可攀。
遷客北行何日到，家書時寄隔年還。
長聞刁斗城碑裏，但見鼉貂樹木間。

聖代豈終才子棄莫教三十髣成斑

渡清川江

安州城外水如天立馬沙頭喚渡船帆帶晚煙依草岸
雁迷殘日下蘆田長途旅客思歸計向老筋骸憶少年
始信在家貧亦好近來雙髣轉蕭然

道中感懷

龍泉鳴吼匣中悲十月西風兩髣絲黃葉滿山秋寺廢
白沙連渚小橋危孤帆過後千峯夕匹馬行時百草衰

牢落故居空入夢，亂藤疎竹有茅茨。

題清道李家壁

南來數月計多違，節序如流已授衣。
旅舍不堪黃葉落，暮天遙望白雲飛。
沙梁雁下寒江渚，門巷煙生苦竹扉。
惟有同來野僧在，病吟相對說西歸。

客懷

此身那復計西東，到處悠悠逐轉蓬。
同舍故人流落後，異鄉新歲亂離中。
歸鴻影度千峯雪，殘角聲飛五夜風。

惆悵水雲關外路漸看芳草思無窮

謝勤上人

新家峽裏老農居田圃收功不願餘百計謀生無上策
數詩排悶有中書秋晴林逕時行藥雨後溪潭見釣魚
惟有野僧知我意近來棲息問何如

無題

瑤絃纖縷合歡牀暖壓紅錢小洞房夢覺秦樓分翡翠
日沉湘浦斷鴛鴦粧鈿寶月明珠綴腰帶盤雲瑞錦囊

十二斜行金雁柱
碧紗如霧掩秋香

梅月堂詩

和鍾靈山居詩

蛺蝶雙雙舞藥畦
薔薇架架采登梯
一叢枸杞花初徧
五桠人參葉已齊
翠竹林中香麝睡
紫荊枝上畫眉啼
千峯昨夜疎疎雨
不分南池漲入溪

無名氏

沈駙馬碧波亭

貴主華亭入翠微，碧窗朱栱有光輝。
春來波暖魚龍出，夜久星疎鳥鵲飛。
海上乘查時貫月，江邊積石舊支機。
當筵勸酒先投轄，不醉應知客不歸。

安南國王黎灝

送錢學士溥歸朝

五嶺天高瘴霧開，詔書飛下越王臺。
萬年重紀黃龍瑞，九譯爭看白雉來。
曉日珠崖標柱在，秋風銀漢使查回。
吾君若問交南事，久已傾心仰上台。

黎景微

奉贈錢學士

紫殿承恩入夢頻
歸鞭裊裊向天津
頽袍色映千山曉
玉節光回萬井春
五嶺風輕金勒緩
三湘月白錦帆新
夜闌宣室如前席
為道交南共帝臣

阮直

送錢學士還朝

曉日初開瘴霧空
歸程馬首正秋風
知音豈限珠厓北

惜別那禁珥水東上國有人還獻納遐方無事賴帡幪
他年兩地如相憶萬里懸情寄塞鴻

黃清

送錢學士還朝

公望端堪邁俊豪遠持使節效賢勞九霄日月瞻依近
萬里江山興詠高別酒頻斟情戀戀歸心莫遏水滔滔
自從回首天南後幾度懷人正鬱陶

黎念

送湛內翰還朝

綸音讀罷紫泥封回首蓬萊第一峯
望外交關千里月夢中帝闕五更鐘
星槎迢遞歸程遠雲樹參差別思濃
南浦吟成憑寄語滔滔江漢共朝宗

安南使臣

題南康縣南野

鼓報黃昏各泊船
咿咿軋軋櫓聲連
一雙鳬雁滄浪外
幾箇人家楊柳邊
紅日落殘鈎挂月
白雲捲盡鏡磨天

安南萬里朝天客暫借郵亭一夕眠

占城貢使

揚州對客

三月維揚富風景暫留佳客與同牀
黃昏二十四橋月
白髮三千餘丈霜
玉局詩翁賢太守
紅蓮書記好文章
欲尋何遜舊東閣
落盡梅花空斷腸

普福

被獲歎懷

來游上國看中原細嚼青松咽冷泉慈母在堂年八十
孤兒為客路三千心依北闕浮雲外身在西山返照邊
處處朱門花柳巷不知歸日是何年

天祥

題虎丘寺

東西兩寺今為一有客登臨見斷碑剩水殘山王霸業
苦風酸雨鬼仙詩樓臺半落長洲苑簫鼓時來短簿祠
盤郢魚腸何處是輓轡千尺響空池

呈同社諸友

君住峯頭我水濱相思只隔一孤雲
夜燈影向空中見晨磬聲從樹杪聞
尺誰知多役夢尋常心似遠離羣
今朝偶過高樓處坐接微言到夕曛

夢裏湖山為孫懷玉作

杭城一別已多年夢裏湖山尚宛然
三竺樓臺晴似畫六橋楊柳晚如煙
青雲鶴下梅邊墓白髮僧談石上緣
殘睡驚來倍惆悵可憐身世老南滇

機先

梁王閣

在碧鷄山下

碧雞飛去已千秋聞說梁王曾此遊
洞口仙桃迎鳳輦
巖前官柳繫龍舟
青山有恨人何在
白日無情水自流
豈識當時歌舞地
寒煙漠漠鎖荒丘

碧雞秋色

滇陽六景之一

碧雞西望水天虛
漠漠秋光畫不如
翠壁煙華搖浪處
丹崖樹色著霜初
前朝有閣今游鹿
落日何人獨釣魚

却訝維舟湓浦上芙蓉九疊看匡廬

無名氏

春雪

昨夜東風換北風釀成春雪滿長空梨花樹上白添白
杏子枝頭紅不紅鶯問幾時能出谷燕愁何日得泥融
寒冰鎖却秋千架路阻行人去不通

御選明詩卷九十一



總校官庶吉士臣侍朝

校對官編修臣莫瞻菴

謄錄監生臣和其聲

欽定四庫全書薈要

集部

御選明詩卷九十二

詳校官原任主事_臣李斯咏

欽定四庫全書薈要卷一萬八千五百九十二

集部

御選明詩卷九十二

五言長律一

蘇伯衡

送王希暘編修使交趾

歷數歸真主群方若綴旒外藩須嗣續當宁重懷柔芝
簡文彌盛茅封禮更優代言欣爾屬將指副予求暫下
層霄去真成萬里遊宮袍裁白紵廐馬出驂騑望重皇



華使名高好時侯揚鞭隨越鳥祖席贈吳鉤自覺光輝
遠那知跋涉修幾旬行嶺嶠何處是交州山擁魚鱗集
江分燕尾流墮鳶從跼跼馴鹿自呦呦綠認枕榔浦紅
看荔子洲馬人偏好客蜨戶總能舟日上扶桑表天垂
瘴海頭昔聞銅作柱今見蜃為樓榭葉時交墜沙蟲或
暗投由來宣至德直欲被遐陬除館迎京使傾城拱道
周陪臣傾伺謹膳宰往來稠樂作聆銅鼓衣更閱貝裘
珍羞羅海錯妙舞雜巴謳蕉實垂垂重椰漿盎盎浮括

囊慙蓄以澀口却扶藁事大無違禮新王實好修有陳
皆睿訓餘事及冥搜足使誠心服端非緩頰侔上方思
子切誰敢為王留別袂逢梅雨歸時指麥秋論思金馬
日頌獻碧雞不

張以寧

賀禮部王尚書本中二十韻

孤竹先賢國三槐故相庭恭惟我文肅籍甚古儀刑金
掌新卿月銀槎舊客星青箱傳遠大綵筆動精靈右掖

何清切中朝重委令判題花燦燦嘯詠竹泠泠宗伯司
周典尚書管漢廷地華人更妙名盛德惟馨斗運天喉
舌雲飛鶴羽翎超朝羣驤褭開宴萬娉婷舞豔圍珠袖
歌長簇錦屏橐荷元映紫簡竹要垂青知貢春題榜焚
香畫鎖廳為公植桃李報國蓄參苓丹宸更新詔蒼生
望永寧芝泥看鳳下薇閣待鸞停傳說升調鼎匡衡奏
引經即應清海岱還復禪云亭自哂依清樾猶慙泛梗
萍卑飛惟短翅終願附青冥

送館主朝憲使之淮西四十韻

宇宙開昌運山川產蓋臣周邦多士貴魯國一儒真江
海襟無際風雷筆有神淵涵珠皎潔山立玉嶙峋剗切
三千牘飛揚四十春粵從遊輦轂早已冠成均泮水開
重席中書擢薦紳贊從淮甸左參憲粵天垠南紀孤飛
隼中臺一角麟大聲搖列岳爽氣動高旻出使方廉察
為郎已選掄治邦用輕典大禮佐宗禋笋立清班峻荷
香紫橐新瓊林無橫賦肺石絕冤民臺省流榮屢朝廷

注意頻庸田俱利導在野不嘖呻全浙推崇劇雄藩藉
撫循申侯仍作翰召伯復來旬海舶回諸國星輶出八
閩層城狐一埽絕島獸皆馴冰蘖俱吾素珠犀詎爾珍
繡衣才受斧芝檢又頒綸雲近蓬萊殿河澄析木津紫
垣依日月黃道上星辰鼎鉉須賢佐網維借舊人飛霜
迎玉節沛雨逐朱輪包尹祠堂外張公水廟濱楚峰涼
浸露淝浪淨無塵秉筆應多暇題詩必絕倫列城俄鎮
靜六轡更容詢晚節看黃菊清秋倚碧筠公心思綠野

帝命簡彤宸昔者開科選先賢贊國鈞文風今有賴盛
德豈無因骨相宵人薄心期令弟親同年俱蹕厲此日
獨沉淪戀主肝猶赤思親鬢似銀十年長自苦孤志若
為伸豈意長淮客叨陪翹館賓銘心感知已報德願終
身

高啟

詠夏冰

寒收凝凍井晚薦納涼宮抱潔存天質銷炎奪化工氣

蒸金盃潤色映玉盤空弱藻含猶在纖塵隔未通非山
寧可倚是水復當融照夜何須月驚秋詎待風製屏應
不隱作珮定難攻客貌清誰並仙肌瑩自同宜涵筠簟
素愁逼桂爐紅願解行人渴分貽道路中

賦得履送行人

穩稱遊方脚新編楚岸蒲滑欺峰頂石危怯世間途輕
曳愁妨蟻高飛笑化鳬上堂聲每衆度嶺影還孤著處
朝行道拋時夜結趺空山欲相訪落葉去踪無

聖壽節早朝

天啟聖圖昌流虹叶夢祥飛龍起江左戰馬放山陽御
柳乘閭闔仙桃熟建章遠人陳貢篚近侍浥爐香金鏡
千秋錄瑤池萬歲觴小臣歌拜手堯日正舒長

禁中雪

君王元尚儉臺殿忽瓊瑤環素凝宮沼飛花綴苑條坊
雞驚曙早仗馬喜寒驕金扇開時看丹墀埽後朝台司
呈賀表樂部奏仙謠須信陽光近都先別處消

冬至車駕南郊

駕動百靈訶齋宮午夜過禮行因日至樂奏合雲和配
祖宗周典祈年陋漢歌壁陳孤月滿燎發衆星羅秩秩
威儀盛穰穰福祉多慶成應預喜四海沐恩波

送恩公還江心寺

上人居寶地勝處是金山樓閣開天界波濤隔世寰鐘
聞孤嶼外剎出亂雲間螺女晨修饌龍君夜叩關遊方
來暫會辭闕去難攀舊業菱生沼離城柳映灣衣霜爐

氣出船載磬聲還施貝來江估持經化島蠻諸緣除未
早半偈悟猶艱安得如康樂登臨此共閒

焚香

艾納山中品都夷海外芬龍洲傳舊採燕室試初焚奩
印灰縈字爐呈玉縷文乍飄猶掩冉將斷更氤氲薄散
春江霧輕飛曉峽雲銷遲憑宿火度遠托微薰著物元
無跡游空忽有紋天絲垂裊裊池浪動沄沄異馥來千
和祥霏却衆葦嵐光風捲碎花氣日蒸醺燈地宵同歇

茶煙午共紛褰帷嫌放早引七記添勤梧影吟成見鳩
聲夢覺聞方傳媚寢法靈著辟邪勲小閣清秋雨低簾
薄晚暝情慙韓掾染恩記魏王分宴客留鵷侶招仙降
鶴群曾攜朝罷袖尚浥舞時裙囊稱縫羅佩簪宜覆錦
熏畫堂空搗桂素壁漫塗芸本欲參童子何須學令君
忘言深坐處端此謝塵氛

月夜遊太湖

欲尋林屋隱還過洞庭遊遠水初涵夜長天盡作秋湖

如青草闊月似白蓮浮萬壑風傳笛三更斗挂舟葉應
隨鳥散山欲趁波流浩蕩吾何適鴟夷不可求

詠夢

的的緣愁得濛濛與醉和輕隨雲浩蕩暗越嶺嵯峨夜
店嗟偏短春閨想最多關山歸識路江渚去淩波梁落
中宵月樓橫欲曙河隔簾休警鵲近燭任飛蛾遊遠寧
煩載穿深豈畏訶寒驚瑤作障暖戀錦城窩蝴蝶誰家
信鴛鴦別浦歌靜嫌風動竹鬧怯雨鳴荷寂歷窗扃紙

低遲帳捲羅知情唯枕共送恨忽鐘過縞袂香猶在朱
弦字不磨記來還彷彿尋去已蹉跎宿燼分餘麝殘妝
暈淺螺憂歡情總幻離合事皆訛池上吟芳草庭前覓
舊柯既因思是種復念睡為魔易斷俄如此難憑竟若
何陽臺莫重問千古笑巫娥

戲嬰圖

芍藥風欄側梧桐露井傍嬌嬰爭晚戲少婦鬪春妝共
詫珠生蚌還憐玉產岡半披文錦祿斜佩紫羅囊額髮

歲蕤短胸胞細膩光庭前王氏子陌上衛家郎弱草身
眠軟芳英手弄香隨人貪作劇避伴學迷藏莫撲花蝴蝶
蝶宜為蠟鳳凰塗添雲母粉浴試水沉湯麟送徐卿宅
蘭生謝傳堂愛均看總好年並比誰長驥種雖難匹鴈
雛已作行欣君得此畫真是夢熊祥

楊基

水邊見新燕

昔別秋風後今來社雨前巢非金屋舊人是玉堂仙願

領公侯似腰肢妓女憐花明春殿雪柳暗御樓煙羅幕
樓長並銀屏過每聯尾寒鶯共濕衣暖蝶爭妍忽見青
帘外俄逢綠水邊莫嗔茅舍小臺榭總蕭然

早秋送趙景普東歸

歌斷復依依情多忍遽違未緣春色晚自感故交稀
舟傍荷花宿人先燕子歸乍涼才却扇多病欲添衣
驛樹風蟬咽江祠雨鶴飛幾時搖艇子來叩竹間扉

元夕京城觀燈與楊廉夫先生同作

琪樹遶春蛾銀燈爛絳羅風柔宵漏永天近月明多瑞
靄浮雙闕繁星動兩河仗迎仙佩去香拂輦塵過萼萼
層層雪魚龍濫濫波清時更良夜游讌莫蹉跎

滕王閣圖

地湧三重閣江橫百尺臺渚霞朝牖闢山雨暮簾開金
奏雲中落銀屏月下來虹霓明綺席星斗弄珠胎歌舞
俄成夢登臨信可哀畫圖迷蛺蝶文甃積莓苔憶赴閤
公宴曾誇子建才長天與秋水千古共徘徊

八月九日祀社稷述事

祝史祝王冊儒臣奉誓詞衣冠陳盛典鉅帑降洪釐用
報金穰瑞仍祈雨露私勾龍嚴配位神棄肅明祠幣玉
趨宗伯笙鏞奏瞽師精靈潛格爾盼蠻儼來思赤壤新
封國元牲舊制儀宣惟宜土穀還得奠邦基師出常依
主君行每告期禮終受多祐民物正熙熙

觀宜春侯旋師

瘴地收蠻後煙江棹槳過旌旗皆繡虎鼓角半吹螺聖

化方無外民心詎有訛馬循歸路熟人比去時多喜氣
浮三峽軍聲動九河遙知雙闕下齊進太平歌

燈夕觀妓戲作豔語

舞緩態偏濃歌停拍未終釵留人勝雪釧響臂羅風不
畫眉長綠非酣臉自紅意將回眼送嬌逐點頭通此夕
瑤臺下當時洛浦中莫言常見慣腸斷杜司空

上巳

煖日風雩好晴江祓禊過徑穿花底窄春向水邊多穠

豔羞桃李輕軀稱綺羅
髻搖金婀娜鞍覆錦盤陀
曲浪留紋羽戕峯進紫駝
遊人傾巷陌啼鳥避笙歌
坐障陰圍柳行茵軟藉莎
漱酣香泛渚滌器膩浮波
富貴唐天寶風流晉永和
暮歸車馬鬧珠翠落平坡

徐賁

送人之吳江

垂虹橋下路此地隔江湖
沙樹應多橘寒魚半是鱸
風將菱唱遠舟帶夕陽孤
離別琴三疊悲歡酒一壺
不堪

憶君處煙雨滿秋蕪

賦得石井贈虎丘蟾書記

來款生公室因尋陸羽泉
虛泓雲液淨陰甃土花圓
竹引歸香積餅分供法筵
虎跑晴見跡龍伏暖浮涎
錫影孤亭日茶香小竈
煙師心如定水應悟趙州禪

送張明府

每喜論文久那堪又送行
壺深淹別酒歌短促離程
水驛孤臨渡寒山半隱城
潮生知海近木落見秋清
明日

車塵下應看父老迎

滕毅

靈應祠

吳船何汗漫周道正倭遲雪涌蝦蟇焙花深石馬祠焚
蘭瞻玉座析羽動金支靈降雲如綵巫歌月在帷林高
懸薛荔洲近被江離小駐娛今夕前驅恐後期嘏傳唯
好語行邁藉蕃禧願沛霑民澤微涓敢自私

劉松

臘月朔日紀懷十八韻

衮衮閒愁集堂堂急景遷殘冬惟一月旅寓向三年霜
入絲萼美風掀錦樹鮮義山通鳥道禾水漲蛟涎雨泣
鳴蛩地雲愁過雁天川光寒不動兵氣慘相纏海上霞
生燧城邊月應弦瘡痍渾未息疫癘恐相煽隴畝遲三
白山林負一屨感時何及矣撫事獨淒然膽落傳新令
家貧食舊編依人慚野燕戀子劇飢鳶席破門懸雨庖
空井悶煙踵山仍畏虎躋地祇憐蛇出感關途梗居愁

賦調煎鹿門那可問桃水徑須沿未必弦真絕虛疑筆
可捐東風如解凍南谷且棲玄

周湏

題營丘山房

周室疏封後齊疆啟國初流風看後裔形勝想遺墟水
合如分魯山回似入徐路疑登載處溪擬釣璜餘紅樹
臨關近青蕪際海疎徵賢方奏頌何暇賦閒居

劉丞直

賦落花

英華本天性開謝任年光自是春風改那因夜雨傷低
迴飄綺席荏苒度雕牆翠霧當窗合紅雲匝地香點泥
登燕壘添蜜入蜂房剪綵誇西苑成妝詫壽陽角哀翻
塞曲逕遠誤漁郎但使靈根在重看錦樹芳

張適

題荆南精舍

結屋近荆溪茅簷綠樹齊竹陰門內外草色路東西山

翠鈎簾入嵐濃埽榻迷雨侵琴薦濕花覆筆牀低引澗
滋瓜圃開渠灌藥畦蘿穿牽石樹鶴步落花泥聽鳥停
杯酌看雲倚杖藜柳深頻見燕村迴不聞雞婦足蠶千
箔兒勤雨一犁著書藏篋笥寫偈寄招提日落兵塵起
煙橫戰馬嘶移家同雁逐擇木羨禽棲繪景娛親憶裝
潢命客題邸窗時展玩歸思倍悽悽

貝瓊

丁未除夕

東風來日本北斗辟玄枵坐並華櫬陰班違紫禁朝清
觴陶令節明燭炳通宵曲任蛾眉唱香添鵲尾燒俗傳
儺逐厲事類博成臬舊疾應全減新歡且共要壓城雲
暗度侵幔雨斜飄紅折叢梅萼青絨弱柳條明朝還獻
歲更頌玉盤椒

管訥

髹几

髹几承恩賜書堂便老臣始知離陰室終得近華茵簡

牘從多積尊彝可間陳色侵書葉冷光映墨花新坐次
移來穩吟邊倚處頻芸香微隱霧梅影暗橫春赤舄應
難擬烏皮詎可倫量心知並潔鑑貌信能真獨對懷殊
遇相依媿此身賦成青玉案欲報諒何因

送僧智益遊浙

鐵佛千年寺高僧始得名裹香參祖塔洗鉢出王城水
向三江渡山投兩浙行馬嘶天竺去虎過石橋迎問法
心應切遊方道可成歸來當結社細與話無生

題伴讀董時貢所藏山水

公館多清暇林泉愜所探人家如谷口風景似江南
斷逕荒深蘚崩厓老巨楠鯨波通海去鳥道與雲參
江艇維晨渚巖扉掩暮嵐雨田收赤黍霜圃摘黃柑
未築清風屋先尋白石菴醉來休荷鋤老去願投簪
許我閒身在從渠俗慮耽偶然忘世累聊謝望雲慙

林鴻

同陳秀才登虎頭巖

勝槩殊三島層闌敞八風雲霞開玉壘日月遶珠宮鳥
道蒼煙外軍城紫氣中山河襟帶遠樓觀畫圖雄物候
逢秋異登攀與子同憶家滄海闊懷古霸圖空地暖初
聞雁江寒已落楓震雷隨急雨野日截殘虹歲月空流
水飄零極轉蓬江湖歸未就徒此羨漁翁

王屋山天壇

名嶽推王屋孤標跨杳冥深窺砥柱黑高並太行青分
野連三晉風雲萃百靈鶴歸松已偃龍去水猶腥竈隱

燒丹火龕餘鍊髓經羽人金磬動應此禮寒星

劔閣秋雲圖

分野秦封盡山川蜀國雄
塹江流地底劔閣起天中
棧險厓頻轉蘿深月不通
飛揚慙白帝開闢憶蠶叢
氣候三秋異猿聲衆壑同
棟雲常礙日巖樹遞呼風
客路隨飛鳥鄉心掛落楓
茲非曠達士應此泣途窮

逢牛尊師

道逢牛道士把酒醉雲房
龍問壺中訣人傳肘後方
久

知鳬是舄更指石為羊遣興聊題翰無言但括囊秋星
明劒氣夜月釀丹光酣飲從傾倒神遊極混茫別情波
渺渺歸路樹蒼蒼又櫂扁舟去尋雲到草堂

冬日同林秀才遊行真觀

蓬島煙霞合琳宮日月開洞陰常積雪地古半藏苔竹
已成龍去人因訪鶴來欲飛王令舄且醉葛洪杯萸熟
經時換炊香待夢回晴光偏悅鳥臘色尚欺梅意靜寒
泓水心同槁木灰鳳笙如可學吹月上瑤臺

重遊宿雲臺憶肅上人

昔日談經處今來獨上慵
古臺黃葉積斜磴紫苔封
片月疑禪觀孤雲想化蹤
夜燈無續火秋院有鳴蛩
人倚題詩竹誰栽出世松
夕陽無限思幾處暮天鐘

周玄

錢舜舉金碧山水圖

風土鄰巴國山河枕蜀城
層流九折轉積石七盤橫
樹影分螢檻崖光護鳥楹
絳雲全抹曙紫磴半牽晴
礧鹿

緣苔卧山猿抱葉行鏡標巖岫合衣拂薜蘿輕旅望迷
驚渚仙遊憶鶴京斷金秦谷恨殘粉漢宮情瀟灑浮埃
軼參差倒景清嶺煙三島暝潭雨百花明桃水真難寫
蓬萊獨異名何能諧雅興端化沐餘生

小李將軍金碧山水圖

池島疑秦屬雲山似洛疆四圍青嶂合一望綠川長野
浦全春樹人家半夕陽峰巒看似繡草木訝聞香凍竹
澌銀雪寒風落錦霜樓思王粲倚谷憶鄭生藏石髮和

煙潤林衣浥露光日華初布煖風信未經涼水泛蛟龍
迫巖居豺虎防魚情空渺漠雁思更微茫獨結巢松興
多懷辟穀方天台與蓬島對此永相忘

陶宗儀

雲莊耕樂三十韻為升遠賦

海寓封疆近朝廷事業昌千官行政教萬姓務耕桑有
美張文學端然世表章亢宗恢雅量卜地構新莊東面
波通泖南頭澤匯洋九山魚米處一曲水雲鄉氛靄翔

鸞鵠峰岑舞鳳凰田疇平若按畎澮浚如隍徑窄黏蒼
鮮橋低蔭綠楊雞豚歸落照鵝鴨戲方塘投老棲身穩
終年引興長程期稽七月候序驗農祥畱播加勤懇芸
培敢怠遑飯休催荷插鐘動課移秧襍穡居常織汙邪
戒勿荒螟蟲遺種絕杭秫瑞葩香犬吠姿雄猛牛馴力
盛強蠶眠絲吐白麥秀浪翻黃花霧琴尊潤林霏枕席
涼漫浮蓮渚櫂爛醉菊籬觴夜雨防衝岸秋風趁築場
師春窮蚤暮歛獲富倉箱覆載恩深感征輸歲謹將艱

難天所鑒報稱理之常里社邀皆去時豐喜欲狂綵衣
娛阿母縹帙教諸郎別墅矜裴相平泉鄙贊皇百花唐
入詠五柳晉流芳昭代能求逸高懷孰可量吾將結鄰
並晚節共徜徉

劉仔肩

夜讌

上相勲庸盛羈人會合難昔曾陪劒戟今乃廁衣冠酒
向佳人醉花隨錦障看篆香凋鴨換銀甲小箏彈內屋

開新色重簾護薄寒旨有呈海陸妙舞播椒蘭賢達儕
梁苑才華擬建安任情從客狎劇飲樂杯乾門第青春
迴星河五夜闌歸鞍拂華薄零露已漙漙

梁蘭

賦玉笥山贈長史入京

靜倚紅蓮幕徐經玉笥山勢盤晴漢表影動碧波間未
遂遊觀趣因陪入覲班掠舟驚鶴過棲壁羨雲還歸旆
春風裏乘閒却試扳

高遜志

送程彥明之松江

同是他鄉客俱為避地人興來猶浪迹別去更沾巾
山路常疑雨江花已報春荒煙投遠戍落日扣通津
樵笠歸墟盡漁蓑度水頻揚帆驚宿鳥鼓柁駭遊鱗
俗薄誰知己時危不計貧飄然滄海上也欲共垂綸

唐之漳

營中閒夜

閒坐樂從戎將軍得上公佩刀懸玉虎釭燼剔金蟲遠
析微侵月清笳迴帶風香騰爐面紫火射箭頭紅舞劍
知書法談碁識戰功明朝當閱武傳令選琬弓

王英

扈從度龍門作

邊塞山川壯關城地勢雄崖傾開鳥道路險瞰龍宮後
隊千旗擁前驅一騎通紆迴多傍澗登陟半凌空雨霽
巖前霧香飄樹杪風雲隨僊仗白花映御衣紅景屬陽

和後恩覃化育中臨高須刻石從此紀神功

魏驥

和移風大樹詩韻

合抱榱楠質塵中不易尋煙霞恒作伴桃李豈知心
幹古經年遠根牢入地深日紅騰宿霧月白下胎禽
禪榻分芳潤經龕幕翠陰負薪樵每憇避暑客長臨
竹傍搖清影鶯遷弄好音只慚樗櫟混不懼雪霜侵
灌溉時時謹瞻依代代欽高標欺朔吹老葉厭秋霖
材固知無價

人須拔久沉蘊奇惟我識入賞更誰吟大匠真能顧明
堂足可任孤懷雖蹇蹇特立聳森森僻處非同昔旁求
却值今萬年期力挽會見出幽林

熊槩

塗中述懷簡張憲副用中李布政昌祺

北闕黃門客南宮粉署郎新詩凌鮑謝妙翰繼鍾王
倬值趨青瑣讎書向玉堂遭逢懷聖主眷顧倚儲皇
超擢之南越旬宣共一方分符來上苑持節去遐荒
匹馬炎

蒸路雙旌瘴癘鄉豺狼應遁跡恩澤已宣揚桂嶺開秦
塞蒼梧拓漢疆野人疎制度蠻俗少冠裳曉白溪多霧
冬青樹不霜四時榕葉暗五月荔支香交誼憐君篤鄉
情媿我涼別離寧有恨會客豈能忘傾蓋酬知己分簪
祇自傷明朝故園雨回首思茫茫

薛瑄

曉登沅州北山頂

嵐靄氤氲重溪行咫尺迷漸登晴巘上始覺衆山低遠

近天無際參差樹不齊川雲平似海石磴峻如梯日出
寒煙外風生碧澗倪異禽和露宿快馬度空嘶遠目回
三蜀高懷遍五溪歸朝誇勝槩沅水有新題

鄧林

二月九日大駕北巡賦詩紀事

虎衛三千士龍旂十二辰兩京嚴古制六載重時巡宿
雨開新霽青陽屆仲春鍾山浮王氣輦路動香塵河岳
提封舊車書制度新覃恩深似海過化速如神壽域熙

民物貞符叶鳳麟太平無以報願效華封人

張璪

惱公詩題遊春士女圖

眉黛彎新月瞳人剪碧波態濃娃館妓腰細楚宮娥緩
踏金蓮步新翻白雪歌輕顰迷下蔡妙舞絕陽阿寢閣
珠為網妝樓錦作窩梨花香玉破柳穗鬱金拖瑟柱鏘
鸞鳳尊壘列象犧瑤釵橫玉燕繡帳研銀鵝小汗肌香
膩微酣臉暈酡櫻脣朱滴滴鴉髻黑我我司馬憐琴癖

周郎顧曲訛喜窺韓壽戶怒擲幼輿梭曉睡啼鶯喚春
遊細馬馱宓妃臨洛浦漢女出江沱拾翠煙堤蕙塞芳
露渚荷畫船青雀舫綵騎玉蹄騶虢國輸妝靨羅敷避
翠蛾使君逢調笑丞相近嗔呵絕豔方如此幽懷定若
何琵琶勞問卜烏兔恐蹉跎睡鴨頻添火牽牛奈限河
幾愁鴛浦隔偶借鵲橋過蝶思迷芳蕊蜂情戀蜜窠封
緘書荳蔻密意托絲蘿錦被薰濃麝霞漿酌巨螺流蘇
垂嬋娜蜀綺疊陂陀井樹棲烏雀筠籠睡翠哥更壺催

漏箭火樹爛瑤柯的的緣思合濛濛與醉和曲屏嫌夜
短斗帳得春多海誓寧教夾山盟詎有它兩情成比翼
萬事付蠻蝸蘭帶同心綰菱盤照膽磨豈徒消夙恨頓
覺起微疴畫裏腸猶斷桑中句厭哦始知傾國貌能作
合歡魔麗玉埋馨地秋娘瘞粉坡至今遊冶客猶為酹
蓬科

朱純

觀燈

春色滿侯家金蓮夜吐花香膏融絳液細燼落金沙閃
閃明珠箔熒熒映碧紗煙凝微作暈燄暖欲成霞綰結
流蘇重繽紛珽帶斜人看隘珠翠月出讓光華遍列雕
闌護高張綉幄遮休言非勅送吟對亦堪誇

商輅

題春景山水

愛此佳山水春來景更妍四郊青嶂合孤岫白雲連地
迴輪蹄絕峰危石磴懸小橋臨曲澗遠浦接平田鬱鬱

林間寺潺潺竹下泉桑麻凝暮靄榆柳繞晴川寶殿凌
千尺茅堂敞數椽僧歸西嶺月漁釣北溪煙倒浸沉波
塔閒橫古渡船樓高平見日松老不知年鳥度浮嵐外
鷗飛落照邊吟筇芳草徑酒旆杏花天隔岸聞鶯語開
軒待鶴旋砌苔深染黛林籟細鳴絃有路通仙境無塵
遠市廛家山在圖畫觸目思飄然

陳獻章

旌節亭瓦雀

瓦雀喜亭樓丹青意自迷雨餘穿麗日花底啁香泥並
語聲全碎追飛羽忽低悠悠去矰繳款款戀懷題卵育
非無地兒群或引梯慣行書案上漸滿井闌西不羨雕
籠養真堪畫卷攜由來親白首那更避青藜狎久如私
昵喧多類滑稽行藏非社燕飲啄混家雞度嶺千回歇
排風幾寸躋冥鴻於汝輩滄海一涔蹄

月桂自白石移來

金粟初分我花仙不吝人煙霞三畝宅草木百年身影

入青霄舊香傳白石新為誰工態度本自惜精神翠竹
旁通徑緋桃正隔津生憂兒女狎莫摘老夫嗔坐久風
回席行遲露在中當時尊玉茗平地隱冰輪收斂還真
性生成荷大鈞相逢山水地一笑武陵春

景雲田韻尾

蓑笠堪從事少年農圃情乘潮打兩漿落日照孤城山
廟題詩過汀鷗伐鼓驚提攜新耒耜寂寞舊棋枰挾被
防春冷攤書讀晚晴兒曹依本分吾道在躬耕

李東陽

棲翠為刑部曹員外鑠父作

山遠平分翠樓高迴得秋暝隨歸鳥至清與故人留地
僻塵稀到雲輕棟欲浮林光新雨淨湖影夕陽收短笏
頻支頰重簾不下鈎畫姿疑淺著詩境入冥搜吏服終
同隱村居且當遊百年渾對此何必泛扁舟

壽瓊山丘先生

周嶽生申日商巖夢說辰共瞻調鼎任純用讀書人位

迴登三事年高過七旬辭章極懇懇天語慰諄諄風雨
停參謁山林謝隱淪金名早定帶玉寵方新月彩占
卿象台階切帝宸汗青嚴袞鉞制草出絲綸芸閣編充
棟鴛班禮絕鄰著龜言必驗藻鑑識還真韋孟分傳業
王褒頌得臣飽經誇腹笥憂國見眉顰義補西山闕途
知泗水津正綱歸史法餘藝入詩神彼杜徒稱斷為曹
但飲醇武休論絳灌儒肯墮楊荀斗柄初迴子葭灰擬
報春雲棲高鸞驚雪骨瘦松筠具爾鈞衡地巍然柱石

身壽筵如許預歌詠敢辭頻

李傑

孔廟紀事次西涯李閣老韻

至聖由天縱斯人足典刑道高王只素文在簡猶青秩
祀從先代尊榮合萬齡廟堂森穆穆金碧煥熒熒回祿
噓妖沴光迫紫冥忽驚空邃宇倏已及前庭古壁殘
遺冊穹碑剥舊銘蒼煙隨燼滅焦塹逐風零寧記諸賢
像誰摹老檜形衣冠猶在望絲竹杳難聽驛報來東郡

封章入大廷，聖情深隱惻。睿旨重叮嚀，祭告誠宜達。趨
踣職所丁，瞻依懷闕里。對越想英靈，大宅門牆峻。高林
草木馨，尼山遙可覩。泗水近須經，衣露常沾潤。帆風渺
御泠，郵程占夜月。征旆帶晨星，傳詔修香幣。騰書具鼎
鉶，絕芽行漢禮。作器象周形，祭統寧教墜。天機自不停
春陽發壇杏，和氣長階蔭。揆日營新制，推波濯燄腥。巖
巖增壯觀，翼翼閱重局。儒道今茲盛，文風被八溟。

陸容

邠寧書事

驅馬邠寧道蕭森值暮秋侵星勞跋涉入境徧咨諏土
俗猶遺古民風近不偷圖存思亶父開國重公劉鄉語
多彈舌成人未裹頭土窯連板屋皮服混羶裘賓饌供
狐兔家貲視馬牛採薪登峻阪汲水自深溝原隰無餘
利丁夫少暇休城隍依險設禾黍藉天收訟獄公庭簡
逢迎驛傳周兵戈幸未及芻粟苦徵求庠序衣冠陋閭
閻賈術稠有司相慰勞旌節暫淹留觸眼傷民瘼縈心

病客愁道人今斷迹聊為記行謀

次韻楊考功雪中見寄

后土承天變司寒應候嚴同雲低布野密雪亂迴檐蕩
漾侵池滅蒙茸拂樹黏陽和雖不競膏澤已冥霑色眩
將迷鶴光搖欲妒蟾渭溝秦棄粉猗澤晉堆鹽頗愜瑤
階迴仍愁蔀屋淹獵原紛旒羽織室漾輕縑持節餐應
苦局門卧亦廉紺園驚改觀碧嶺訝頽尖窘兔留新跡
多魚伏有潛入歌難和曲愛舞漫窺簾屑下杭辭磴灰

飛楮就炎軟紅連日淨漲綠與春添歸騎銀垂鬣行人
玉綴髯微聲疑霰雜細轉覺風恬照晚分燈力傳更錯
漏籤六花千里遍三白一冬兼擬絮憐才逸充茶覺味
甜熾爐身喜近凍筆手慵拈螟螣當深入來牟預可占
冷魂憑酒喚寧避老饕嫌

楊一清

和孫思和西莊聯句韻

白雲封石壁修竹護村莊煙火長林外笙歌古道傍謾

論傾肺腑兼得話農桑
想象三時雨依稀百合香
人應誇二美吾亦詫微長
幾日交歡地真教爾汝忘

儲巖

歲寒亭牡丹次子佩韻

春晚羣芳歇時情屬此花
託根依漢署品色擅姚家
仙種誰傳譜王封合用麻
佩囊薰麝馥妝鏡洗鉛華
寵早爭懸綵憐遲密護紗
悞銜防野鹿偷啄怪林鴉
艷若疑交競嫣然豈自誇
砌添苔色映闌受樾陰遮
爛賞真疑

數流光詎許賒為渠生百感醉墨任橫斜

滁易道中漫興

野曠疑停騎風高且下帷長途消白日小市出青旗廢
邑人煙聚僑居土語移吹空嵐作雨迸岸凍流澌水宿
迴帆遠鄉書入遞遲北征隨塞雁楚思詠江蘺山挹環
滁勝舟貪涉泗奇中原方騁望獻歲正逢時行李非留
滯山川愜夢思長安小兒女好在數歸期

沈周

漁村

吳江本澤國漁戶小成村楓葉點秋屋蘆花白夜門都
無三姓住漫可十家存熟酒呼兒女分魚喧弟昆不憂
風雨橫雉憚水衡煩鷗趁撐舟尾蟹行穿壁根怡然樂
生聚業外復何言

祝允明

春遊虎丘雜題

春光滿郊外吾獨愛西丘碧水一池定白雲千頃流散

人歌小海幼伎撥箜篌遠著謝公屐高登王粲樓人生
一杯酒又是一年遊

遙看隔水倚窗釣魚

芳原落日裏織女夜臨河灼灼呈紅玉盈盈隔綠波金
環約柔腕玉體挂輕羅謾自傾銀海無因化水梭承伊
纖手弄深淺任如何

陸深

春野

緲緲蕪煙綠依依柳日明好山圍畫幃細水咽琴聲心
遠江湖適身閒散冕輕鞬鷹回夜獵攜鶴看晨耕藉草
遙憐色愛花時問名韶光偏屬我節序總關情蜜足蜂
群倦泥融燕陣爭臨風一杯酒相與了浮生

詠雪

虛館都門裏遙空雨雪時雲同山受鎖霰集地承篩初
對無還有徐看正復差霏霏旋布密陳陳漸成奇入瓦
猶飛溜披牆故累基蒼皇忙宿旅鼓舞走群兒氣襲裘

功劣光搖眼力衰撲階登陞級打戶閣戾戾勢倍初昏
會威伸入夜期空林愁鳥雀曠野失狐狸古屋深藏脊
危城正沒罍窗腰明敝紙字脚飽殘碑山勢勻肥瘠潮
聲帶嘯悲贅疣瘡竹節擁腫病松枝池沼甘居下郊原
苦厭卑當庭昏有影卧地險成夷田犬思馳逐羈鷹欲
奮追四簷迷一色獨榻下重帷風過梅苞瘦陽回麥壠
宜墨池乾更掬茶鼎渴旋滋真足臨書卷應堪弄酒卮
樓臺誇富貴歌調競嗚咿坐擁嬌娥鬢杯分俠士髭生

憐江上客困憶隴頭師帆濕橈迎凍兒膠馬礙馳豐年
昭國瑞聊復一題詩

李夢陽

華嶽二十韻

有嶽雄西土三峰插渭川省方朝白帝分野障金天
逖矣威靈赫遐哉秩望虔百王開寶錄七聖演瑤編
綺殿丹青列文窗俎豆聯風雲蒸大壑日月避層巔
驚舉天門闢鼇呿地軸旋巖巒莽翕沓嶺嶂鬱綿
翩猿挂仙人

掌羅飛玉女，泉霞霽夕的。樂錦繡曉相鮮，葛藟搖金壁。
芝苓冒紫煙，石膏滲復結。鍾乳滴猶懸，右壓秦吳壯。
南包漢鄧偏，徒追散馬日。緬憶祖龍年，箭括通神戶。
雲臺秘妙筌，豈惟棲鳳侶。亦以遜鴻賢，方士騎茅狗。
宮人採石蓮，褰帷瞻窈窕。挂笏悵攀緣，陰井邀雷馭。
陽崖起電鞭，聊遊凌絕頂，不為學神仙。

少傅西崖相公六十壽詩三十八韻

龍馬千年會崧高，萬古神負圖曾翊聖間。氣又生申頴

拔元無敵清修況絕倫生來近日月齟齬上星辰懷橘
休前輩探鏤祗後身早承金馬詔竟冠玉堂賓講幄時
霑醉宮坊數賜珍文章班馬則道術孟顏醇絕藝邕斯
上高情頡籀鄰一揮驚霹靂隻字破風塵絢練王侯宅
蒼茫海嶽濱幽劖光沕窟巨榜照嶙峋星燦將軍碣雲
垂學士珉崖題半吳楚墨刻徧齊秦振鷺天衢麗登龍
野服臻諸生彌濟濟夫子益循循江漢誰堪濯桃梅自
有春空傳馬融帳真慕介休巾憶昔逢先廟援公輔大


鈞至人虛密勿君子以經綸商鼎調和切虞廷吁咈頻
八方生氣象萬物荷陶甄日晏離黃閣雞鳴侍紫宸羹
分紫駝背袍錫錦麒麟顧命留元弼今皇禮舊臣屹然
匡社稷公論在朝紳鶉首星躔徙龍飛歲序新風雲回
甲子天地慶茲辰却老形如鶴憂時鬢若銀含悽麾賀
客雅志為蒸民愚也蓬蒿士蕭條塞鄙人猥蒙噓弱羽
從此躍塗鱗原憲終多病彭宣晚見親臨洋徒歎惋學
步轉遭屯寶繪開蓬島清歌頌大椿微涓寧溢海撮土

詎增岷古意同如此中懷托具陳願為金石檄永永濟
迷津

龍沙遇毛君武亭再餞

羈鴻常慕侶谷鳥友先求不盡龍宮興翻成虎帳遊夏
深濃岸柳雨減出蘆洲棹艤北沙穩山迎西戶幽江湖
半落照風水獨離憂舊部群公薦新符百粵州天浮洞
庭闊海盡日南流白首今遙別金尊莫惓留

御選明詩卷九十二



總校官庶吉士臣侍朝

校對官編修臣莫瞻蒙

謄錄監生臣和其聲